

Sambanwá

GIYA SA PAGESAMBA KAN BANWAAN NIN DIÓS

IKA-LIMANG DOMINGO KAN PASCUA KAN PAGKABUHAY-LIWAT
07 MAYO 2023 • TAON A • PUTI

RITO SA PAGPOÓN

Pataratara

C — An pag-akò kan balaog nin kaligtasan iyo an panahon nin kapanoan. An kapanoan iyo an pag-akò ki Jesus bilang dalan, katotoohan, asin buhay. Danay kitang magsarig saiya. Iyo ini an mensahe na satuyang paghohorop-horopan sato kan celebracion niato kan Eucaristia.

Antifona sa Paglaog

(Cf. S 97, 1-2) (Tindog)

(Sinambit kun mayo nin Awit sa Paglaog)

Mag-awit kamo sa Kagurangnan kan bâgong awit, huli ta an Kagurangnan naggibo kan mga ngangalasan; sa atubangan kan mga nación siya nagpahayag kan saiyang katanosan, alleluia.

Pagpangurus asin Pagtaong-galang

P — Sa ngaran kan Amâ, asin kan Aki, asin kan Espiritu Santo.
B — Amen.

P — An Kagurangnan mapa-saindo.
B — Asin sa saimong espiritu.

Gawe nin Pagsolsol

P — Mga tugang, akoon ta an satong mga kasâlan, tanganing magkanigo kitang magcelebrar kan mga banal na misterio.

Gabos — Nagkukumpisal ako sa Diós na makakamhan, asin saindo, mga tugang, ta nagkasalâ ako nin makuri sa isip, sa tataramon, sa gibo, asin sa kapabayaan: salâ ko, salâ ko, makuring salâ ko. Kaya nangangadyi ako ki Santa Maria, danay na Virgen, sa gabos na Angeles asin Santos, asin saindo, mga tugang, na ako ipamibi sa Kagurangnan tang Diós.

P — Maherak man lugod sato an Diós na makakamhan asin, pakapatawada an satong mga kasâlan, darahon kita sa buhay na daing kasagkoran.
B — Amen.

Kyrie

P — Kagurangnan, maherak ka.
B — Kagurangnan, maherak ka.
P — Cristo, maherak ka.
B — Cristo, maherak ka.

P — Kagurangnan, maherak ka.
B — Kagurangnan, maherak ka.

Kamurawayan

Gabos — Kamurawayan sa Diós sa kaitaasan asin sa dagâ katoninongan sa mga tawong marahay an boót. Inoomaw mi ika, rinorokyaw mi ika, sinasamba mi ika, pinapamuraway mi ika, pinapasalamatan mi ika huli kan dakula mong kamurawayan, Kagurangnan na Diós, Hadeng langitnon, Diós Amang makakamhan. Kagurangnan Aking Bogtong, Jesu Cristo, Kagurangnan na Diós, Cordero kan Diós, Aki kan Amâ, ika na nagpaparâ kan mga kasâlan kan kinâban, kaheraki kami; ika na nagpaparâ kan mga kasâlan kan kinâban, akoa an samong pakimaherak; ika na nagtutukaw sa too kan Amâ, kaheraki kami. Ta ika sana an Banal, ika sana an Kagurangnan, ika sana an Orog Kahalangkaw, Jesu Cristo, kaiba kan Espiritu Santo: sa kamurawayan kan Diós Amâ. Amen.

Colecta

P — Mamibi kita.

O Diós na makakamhan asin daing kasagkoran, danay na hamanon mo samuya an sacramento kan pascua, tanganing an mga pinagkanigo mong bâgohon huli kan banal na bonyag, magdolot nin dakul na bunga sa tabang kan saimong pagbantay, asin itugot mo na makaabot sa mga kaogmahan nin buhay na daing kasagkoran. Huli ki Jesu Cristong Kagurangnan niamo, saimong Aki, na kaiba mong nabubuhay asin naghahade, kasarô kan Espiritu Santo, Diós, sa gabos na kapanahonan kan mga panahon.
B — Amen.

LITURGIA KAN TATARAMON

Enot na Babasahon (Tukaw)

(Gibo 6, 1-7)

An enot na babasahon manonongod kan pagpili kan pitong mga lalaki na panô kan

Espiritu tanganing magtabang sa mga apóstoles sa paglingkod sa katawohan.

Pagbasa sa Mga Gibo kan mga Apostoles

Kan mga aldaw na idto, mantang nagdudugang an mga disipulos, nagkaigwa nin mga paggumod-gumod sa mga Helenista laban sa mga Hebreo, huli ta napapasipara sa aroaldaw na paglingkod an mga balo nindang babae. Kaya inapod kan Dose an dakulon na mga disipulos asin sinabihan: “Bako magayon na bayaan mi an tataramon kan Diós para maglingkod sa mga lamesa. Mamili kamo saindo, mga tugang, nin pitong lalaki na iginagalang, panô kan Espiritu asin katonongan, na papamahalaon ta sa pangangaipong ini; mantang kami magpapakaimbod sa pagpamibi saka paglingkod sa tataramon.” Naoyonan an isinabi kan bilog na grupo, asin pinili si Esteban, lalaki na panô nin pagtubod asin Espiritu Santo, si Felipe saka si Prócoro, si Nicanor saka si Timon, si Parmenas saka si Nicolas, sarong prosélitong Antioqueno. Pinaatubang sinda sa Apostoles, asin pakapamibi, pinatungan sinda kan mga kamot. An tataramon kan Diós naglalakop, asin nagdudugang nin marahay an bilang kan mga disipulos sa Jerusalem; pati dakulang grupo kan mga padi nagkukuyog sa pagtubod.

Tataramon kan Kagurangnan.
Gabos — **Salamat sa Dios.**

Salmo Responsorial

(Salmo 33, 1-2. 4-5. 18-19)

S — Kagurangnan, kaheraki kami na nagsasarig saimong.

- Mag-ogma kamo, mga suripot, sa KAGURANGNAN; sa mga matanos na bagay an pag-omaw. Magpasalamat kamo sa Kagurangnan sa arpa; sa lirang sampolo an dulos magtugtog saiya. (S)
- Ta matanos an tataramon kan KAGURANGNAN asin an gabos sa kaimbodan. Namomôtan niya an kasuripotan saka katanosan; panô nin pagkaherak kan Kagurangnan an dagâ. (S)

3. Uya, an mga mata kan KAGURANGNAN pasiring sa mga may pagkatakot saiya, para sa mga naghahalat kan saiyang pagkaherak, sa pag-agaw kan saindang mga kalag sa kagadanan asin sa pagbuhay sainda sa tig-gutom. (S)

Ikaduwang Babasahon

(1 Pedro 2, 4-9)

Kita gabos inaapodan na magin man mga buhay na gapo – nagpapatindog kan espirtual na harong, banal na pagkapadi na nagdodolot nin mga atang na espirtual.

Pagbasa sa Enot na Surat ni San Pedro

Mga namomòtan: “Magdolok kamo saiya, buhay na gapo, isinikwal nin mga tawo, alagad sa mata kan Diós pinili asin mahalaga. Kamo mismo, siring sa buhay na gapo magpatugdok kamo na magin espirtual na harong na magigin banal na kapadian na magdodolot nin mga espirtual na sacrificio na ákong marhay kan Diós huli ki Jesu Cristo. Ta yaon sa kasuratan: ‘Uya, mabugtak ako sa Zi’on nin gapo, gapong sarigan, pinili asin mahalaga, asin an nagtutubod saiya dai mapapasupog.’ Kaya an onra sainda na nagtutubod, alagad sa mga dai nagtutubod: ‘An gapo na isinikwal kan mga paratugdok, ining gayo an nagin sarigan,’ asin ‘gapong napapasingkogan, gapong nakakapasukamang.’ Nasisingkog sinda na nagsusuwail sa tataramon, sukat sainda na diyan itinalagá. Alagad kamo piniling lahi, hadeng kapadian, banal na nación, banwaan na pinagalan para masadiri, tanganing irokyaw nindo an mga gibong ngangalasan kan nag-apod saindo hale sa diklom pasiring sa makangangalas niyang liwanag.

Tataramon kan Kagurangnan.

Gabos — Salamat sa Dios.

Pagrokyaw

(Tindog)

(Sinambit kun dai inaawit an Alleluia)

Allelúia, allelúia. Ako an dalan, an katotoohan asin an buhay, olay kan Kagurangnan. Dai nin nakaabot sa Amâ kun dai nag-agi sa sakô. Allelúia, allelúia.

Evangelio

(Juán 14, 1-12)

P — An Kagurangnan mapa-saindo.

B — Asin sa saimong espiritu.

P — ✠ Pagbasa kan banal na Evangelio susog ki **San Juán.**

B — Kamurawayan saimo, Kagurangnan.

Nagsabi si Jesus sa saiyoung mga disipulos: “Dai magpara-kapurisaw an saindong puso. Nagtutubod kamo sa Diós, magtubod man kamo sako. Sa harong kan sakong Amâ dakul an dagosan. Kun dai, nagtaram kutâ ako saindo. Malakaw ako ta maandam nin lugar para saindo. Kun ako makakalakaw asin makaandam nin lugar para saindo, mabalik ako asin kukuahon ko kamo para sakuya, tanganing kun saen ako, duman man kamo. Kun saen ako maduman, aram nindo an dalan. Nagsabi saiya si Tomás: “Kagurangnan, dai mi aram kun saen ka maduman; pâno mi maáraman an dalan?” Nagsabi saiya si Jesus: “Ako an dalan, an katotoohan asin an buhay. Mayo nin makakadolok sa Amâ kundi huli sakô. Kun midbid nindo ako, an sakong Amâ mamimidbidan man nindo: poon ngonian mamimidbidan nindo siya asin nahiling nindo siya.” Nagsabi saiya si Felipe: “Kagurangnan, pahilingan samo an Amâ, asin tama na iyan samo.” Nagsabi saiya si Jesus: “Haloy nang panahon na kaiba nindo ako asin dai pa nindo ako midbid, Felipe? An nakahiling sako, nakahiling man sa Amâ. Tâno ta nagsasabi ka: ‘Pahilingan samo an Amâ?’ Dai ka nagtutubod na ako yaon sa Amâ asin an Amâ yaon sako? An mga tataramon na isinabi ko saindo, dai ko sadiring tinataram, an Amâ na danay na yaon sako iyo an naggigibo kan saiyoung mga gibo. Magtubod kamo sako: Ako yaon sa Amâ asin an Amâ yaon sako; kundi dai, huli kan mga gibo man sana magtubod kamo. Amen, amen, nagsasabi ako saindo: An nagtutubod sako, maggigibo man kan mga trabaho na ginigibo ko, asin orog kadakula kisa mga ini an gigibohon; huli ta ako malakaw pasiring sa Amâ.

P — Marahay na Bareta kan Kagurangnan.

B — Pag-omaw saimo Cristo.

Homilia (Tukaw)

Pagrokyaw

kan Pagtubod (Tindog)

Credo Apostolico

Gabos — Nagtutubod ako sa Diós Amang makakamhan, Kaglalang kan langit asin dagâ, asin ki Jesu Cristo, Aking bogtong niya, Kagurangnan ta,

(Sa mga minasunod na tataramon, abot sa asin nani-tawo, an gabos minaduko.)

ipinangidam huli kan Espiritu Santo, namundag ki Virgen María, pinasakitan kan panahon ni Poncio Pilato, ipinako sa cruz, nagadan, asin ilinubong, huminilig sa mga gadan, kan ikatolong aldaw nabuhay-liwat hale sa mga gadan, suminakat sa kalangitan, nagtutukaw sa tóo kan Diós Amang makakamhan, hale duman mabalik sa paghukom sa mga buhay asin mga gadan. Nagtutubod ako sa Espiritu Santo, sa banal na Simbahan na catolico, sa paropakinaabang nin mga santos, sa pagpatawad nin mga kasâlan, sa pagkabuhay-liwat nin laman, sa buhay na daing kasagkoran. Amen.

Pamibi nin Banwaan

P — Tiripon bilang banwaan na nangangaipo, mamibi kita sa Amâ sa mapakumbabang boót, nagsasarig sa saiyoung dakulang pagkaherak asin pagkamoot.

S — Kagurangnan, hinanyoga an samong pamibi.

1. Tanganing an Simbahan magin tanda nin kaligtasan na nagpapahayag ki Jesus, an dalan, an katotoohan asin an buhay, ipamibi niato sa Kagurangnan. (S)
2. Tanganing an mga nagsasakit nin kulog, kapurisawan, pagkatakot asin kamundoan magkamit nin kusog sa saindang mga pagsubok, ipamibi niato sa Kagurangnan. (S)
3. Tanganing an mga nalagalag sa tamang dalan pasiring sa buhay mag-akò kan biyaya na mamidbid giraray an kaogmahan sa paglakaw sa dalan na inagihan ni Cristo, ipamibi niato sa Kagurangnan. (S)
4. Tanganing an mga naghehelang sa satong comunidad (Parokya) maranga sa saindang masakit na kamugtakan huli kan tabang asin pag-anduyog kan saindang mga familia asin mga katood, ipamibi niato sa Kagurangnan. (S)
5. Tanganing an mga gadan makisumarô sa kapanoan nin buhay na ipinanggana ni Cristo para sainda, ipamibi niato sa Kagurangnan. (S)

P — Ama niamo sagkod pa man, nagpapasalamat kami saimo huli kan saimong karahayan sa pag-apod samo sa bâgong buhay nin saimong Akì, giyahan asin surogon mo kami sa samong mga kinakasibotan, magdanay kami sa paglingkod saimo sa samong pagmangno sa kapwa. Huli ki Cristo samong Kagurangnan.

B — Amen.

LITURGIA KAN EUCARISTIA

Pagdolot *(Tukaw)*

(Sinambit kun mayong Awit sa Pagdolot)

P — Inoomaw ka, Kagurangnan, Diós nin gabos na linalang, huli ta sa saimong pagka-matinao nag-ako kami nin tinapay, na idinodolot mi saimo bunga kan dagâ asin kan gibo kan mga kamot nin mga tawo, ini magigin para samo tinapay nin buhay.

B — **Pag-omawon an Diós sagkod pa man.**

P — Inoomaw ka, Kagurangnan, Diós nin gabos na linalang, huli ta sa saimong pagka-matinao nag-ako kami nin arak, na idinodolot mi saimo bunga kan balagon asin kan gibo kan mga kamot nin mga tawo, ini magigin para samo inomon nin kalag.

B — **Pag-omawon an Diós sagkod pa man.**

P — *(Tindog)* Magpamibi kamo, mga tugang; tanganing an sako asin an saindong atang maako man lugod kan Diós Amang makakamhan.

B — **Akoon man lugod kan Kagurangnan an atang sa saimong mga kamot para sa kaomawan asin kamurawayan kan saiyang ngaran, para man sa pakinabang niato asin kan bilog niyang banal na Simbahan.**

Pamibi sa mga Dolot

P — O Diós, kaming ginibo mong mga kasumarô kan sarô asin nangongorog na pagka-diós, sa bagsik kaining sinasambang pagtiniao-taohan kan sacrificio, nakikimaherak, na gibohon mo, tanganing siring na minidbid mi an saimong katotoohan, kami man lugod makasunod kaiyan huli kan mga marahay na ugali. Huli ki Cristo samong Kagurangnan.

B — Amen.

Prefacio II sa Pascua kan Pagkabuhay-liwat

An bâgong buhay ki Cristo

P — An Kagurangnan mapasaindo.

B — **Asin sa saimong Espiritu.**

P — litaas an mga puso.

B — **Initaas mi na sa Kagurangnan.**

P — Magpasalamat kita sa Kagurangnan, satuyang Diós.

B — **Maninigo asin Dapat.**

Totoong maninigo asin dapat, matanos asin nakakaligtas: na ika, Kagurangnan, ipagrokyaw sa gabos na panahon, ata ngani mas mamuraway na iharubay

orog nang gayo sa panahon na ini na si Cristo samong Pascua idinolot na sacrificio.

Huli saiya namumundag an mga akî nin liwanag para sa buhay na daing kasagkoran asin nabubuksan an mga tatâ kan langitnon na kahadean sa mga maimbod.

Huli ta tinubos an samong kagadanan kan saiyang kagadanan, asin sa pagkabuhay niya liwat an gabos nabuhay-liwat.

Kaya, sa labi-labing kaogmahan kan pascua, nag-oogma an gabos sa bilog na kinâban. Pati ngani an mga langitnon na virtudes asin an mga angeles na potestades, nag-aawit kan himno kan saimong kamurawayan, daing-tapos na nagsasabi:

Gabos — Banal, Banal, Banal an Kagurangnan Diós ni mga hukbô. An langit asin dagâ pano kan Saimong kamurawayan. Hosâna sa kaitaasan. Paladan an minadigdi sa ngaran kan Kagurangnan. Hosâna sa kaitaasan.

Pamibi sa Eucaristia *(Luhod)*

P — Misterio kan Pagtubod.

B — **An pagkagadan mo, Kagurangnan, ipinapamareta niamo, an Pagkabuhay mo liwat ipinapahayag, sagkod na ika magdatong.**

P — Huli saiya, asin kaiba niya, asin sa saiya, saimo Diós Amang makakamhan kasarô kan Espiritu Santo, an gabos na kagalangan asin kamurawayan, sa gabos na kapanahonan kan mga panahon.

B — Amen.

RITO SA PAGCOMUNION

Ama Niamo *(Tindog)*

P — Natukdoan kan mga nakakaligtas na tugon, asin pinatood kan diónnon na kaugalian, nangangahas kitang magsabi:

Gabos — Ama niamo, na yaon sa langit: pabanalon an ngaran mo; magdatong an kahadean mo; mangyari an boót mo sa dagâ nin siring sa langit. An samong kakanon sa aroaldaw itao mo samuya ngonian, asin patawadon mo kami sa samong mga kasâlan, siring na pinapatawad niamo an mga nagkakasalâ samuya; asin hare kami pagdaraha sa sugot; kundi agawa kami sa maraot.

P — Agawa kami sa gabos na maraot, namimibi kami Kagurangnan; warasan sa mga aldaw niamo an katoninongan,

tanganing kaming natabangan kan saimong pagkaherak magin danay na talingkas sa kasâlan asin man ligtas sa gabos na kapurisawan: mantang kami naghahalat kan maogmang paglaom asin pagdatong kan samong Paraligtas na si Jesu Cristo.

B — **Huli ta saimo an kahadean, asin an kapangyarihan, siring man an kamurawayan sa mga kapanahonan.**

P — Jesu Cristong Kagurangnan, ika na nagsabi sa saimong mga Apostoles:

Katoninongan iwinawalat ko saindo, an sakong katoninongan itinatao ko saindo: hare paghilinga an samong mga kasâlan, kundi an pagtubod kan saimong Simbahan; asin papagkanigoa na siya mapatoninong asin magkaboronyog susog sa saimong kabôtan.

B — Amen.

Pagpahayag kan Katoninongan

P — An katoninongan kan Kagurangnan danay na mapasaindo.

B — **Asin sa saimong espiritu.**

P — Magpatinaraohan kamo nin katoninongan.

Cordero

B — **Cordero kan Diós, na nagpapara kan mga kasâlan kan kinâban: kaheraki kami. Cordero kan Diós, na nagpapara kan mga kasâlan kan kinâban: kaheraki kami. Cordero kan Diós, na nagpapara kan mga kasâlan kan kinâban: tawi kami nin katoninongan.**

Pag-alok sa Pagcomunion *(Luhod)*

P — Uya an Cordero kan Dios, uya an nagpapara kan mga kasâlan kan kinâban. Paladan an mga inapod sa pamanggi kan Cordero.

Gabos — Kagurangnan bako akong maninigo na ika magdagos sa sakuyang harong: alagad magtaram ka sana, asin an sakong kalag maomayan.

Antifona sa Comunion

(Jn 15, 1. 5) (Tindog)

(Sinambit kun mayong Awit sa Comunion)

Ako an tunay na balagon asin kamo an mga sanga, olay kan Kagurangnan; an nagdadanay sakuya asin ako saiya, ini an nagtatao nin dakul na bunga, alleluia.

Pamibi Pakacomunion

P — Mamibi kita.

Kagurangnan, nakikimaherak kami, magkanigong maghumare ka sa saimong banwaan na tinukdoan mo sa paagi kan mga langitnon na misterio, asin gibohang magduman hale sa lumang pagkabuhay pasiring sa bâgong buhay. Huli ki Cristo samong kagurangnan.

B — Amen.

RITO SA PAGT APOS

Solemng Bendicion

P — An Kagurangnan mapa-saindo.

B — Asin sa saimong espiritu.

P — Magduko kamo sa pagbendicion.

An Diós, na huli kan pagkabuhay-liwat kan Bogtong niyang Akì, nagpakanigong magwaras saindo kan karahayan nin pagtubos asin pag-ampon, magwaras saindo na mag-ogma sa saiyang bendicion.

B — Amen.

P — Asin huli ta siya an nagtubos nagkamit kamo kan balaog nin danay na katalingkasan, asin huli ta siya an nagwaras, magkanigo kamong makisumarô sa daing-sagkod na pamana.

B — Amen.

P — Asin sa pagtubod saiya kamo binuhay-liwat sa bonyag, sa matanos na pagkabuhay ngonian kamo pagkanigooon na iayon sa langitnon na eerokan.


B — Amen.

P — Asin an bendicion kan Diós na makakamhan, Amâ, asin Akì, ✠ asin Espiritu Santo, maghilig asin magdanay saindo sagkod pa man.

B — Amen.

P — Lakaw kamo sa katoninongan ni Cristo, allelúia, allelúia.

B — Salamat sa Diós, allelúia, allelúia.



LITANIA NIN PASASALAMAT PAKATAPOS KAN PANDEMIANG COVID-19

P — Magdolok kita sa Kagurangnan, na minabâgo kan gabos, para sa gabos niatong inakong balaog asin biyaya kan panahon nin pandemia-Covid. Sa lambang pag-arang, kita gabos masimbag:

S — Salamat sa Diós.

1. Sa pagpagiromdom samo kan kaluyahan nin buhay, sa pagampon samo kan mayo nang nangangahas na maglindong samo asin sa pagbukas kan samong mga isip sa tunay na kaipuhan sa buhay, kita magpasalamat sa Kagurangnan. **(S)**
2. Sa pagtugot samo na makisumarô na may pagtubod asin pagkamoot sa lambang sarô, dawa na ngani kami siniblag nin huli kan kahelangan, magpasalamat kita sa Kagurangnan. **(S)**
3. Para sa isog-boót kan mga naghatod samo nin tabang na científico, social asin espiritual dawa sa tahaw nin mga peligro asin humâ sa saindang buhay, magpasalamat kita sa Kagurangnan. **(S)**
4. Para sa balaog kan mga bâgong tugdas na bulong asin bakuna laban sa virus asin an natural na pagsugpò kan paglakop kaini, magpasalamat kita sa Kagurangnan. **(S)**
5. Para sa balaog nin danay na presencia, kan kami napupurisaw asin naghohorasa, namumundô asin nagsolo-solo, siring man kan nawâran nin paciencia kan panahon nin pandemia, magpasalamat kita sa Kagurangnan. **(S)**

P — Mamibi kita.

Mamomoton na Diós, dai kaming inisip na dai mo aram. Daing luhang pinabulos niamo na dai mo pinagmakulugan Mayo kaming maogmang pigcecelebrar na bâgo sa saimo. Naglaog ka sa samong kinâban nin kahelangan, pagtios asin kagadan asin aram mo an samong katakotan na inaatubang. Akoa an samong pasasalamat huli kan saimong mamomoton na pagmangno sa panahon kan COVID-pandemia. Siring kan saimong pagtangis sa pagkagadan ni Lazaro, hangosan mo man kan hinangos kan buhay na daing kasagkoran an gabos na nagadan huli kan coronavirus. Ginibo mong kaogmahan samong katakotan huli kaini kami nagpapasalamat asin nag-oomaw saimo. Sa saimo an kamurawayan ngonian asin sagkod pa man.

P — Nuestra Señora de Peñafrancia,

B — Ipamibi mo kami.

P — San Miguel Arcangel,

B — Ipamibi mo kami.

P — (Santo/a patron/a kan parokya o comunidad),

B — Ipamibi mo kami.

P — Divino Rostro,

B — Kaheraki kami.

 **sambanwá**
GIYA SA PAGSAMBA KAN BANWAAN NIN DIÓS



MOST REV. ROLANDO J. TRIA TIRONA, OCD, DD, Arzobispo kan Caceres
REV. FR. LUISITO A. OCCIANO, Direktor, Caceres Commission on Communications
REV. FR. GLENN C. RUIZ, Direktor, Commission on Liturgy
REV. FR. ERIC P. BOBIS, In-Charge, Social Media
JOHN PAUL M. AVEN asin **JUAN CARLOS R. MADRID,** Mga Editor

Hinimo asin inandam kan Archidiocesis nin Caceres, sa pangengenot kan Caceres Commission on Communications asin Commission on Liturgy.
Ciudad nin Naga, Pilipinas • 2023

TABANGAN NA MASUSTENIR AN SAMBANWÁ!

Para sa mga donacion, puwedeng magdeposito sa:

Banko asin Branch: **BDO UNIBANK, INC. (BDO) PANGANIBAN DRIVE, NAGA CITY**
Account Name: **CACERES COMMISSION ON COMMUNICATIONS**

Account Number: **008440050319**